



**Gemeinsam Äntwert vum Här Minister fir sozial Sécherheet a vun der Madamm
Gesondheetsministesch op d'parlamentaresch Fro n°7636 vum 21. Februar 2023 vum
honorablen Deputéierten Här Sven Clement iwwert den Espionnage vu Lëtzebuerg duerch
d'Russen iwwert d'Plattform eSanté**

1. Stëmmt et, datt GCore den eConsult fir eSanté (oder liéiert Servicer) entwéckelt huet?

Beim Ausbroch vun der COVID-19 Pandemie, dat heescht tëscht Mëtt-Mäerz an Ufank Abrëll 2020, huet d'Krisen-Cellule vun der Lëtzebuenger Regierung d'Agence eSanté domadder beobtraacht, en medezineschen Telekonsultatiounsdéngscht op d'Been ze stellen, fir esou d'Propagatioun vum Virus an de medezinesch Cabineten ze limitéieren.

An deem Kontext huet d'Agence eSanté eng dréngend Consultatioun vu verschidde Firmen gemaach, wo raus letztendlech eng Lëtzebuenger Firma, déi zur Lëtzebuenger Wagner-Group (<https://wagnergroup.lu/>) gehéiert, zréckgehalen gouf. Dës Firma, d.h. « Wagner ICT », stellt an hebergéiert den e-Consultatiounsservice op Serveuren déi hei zu Lëtzebuerg baséiert sinn.

Am Kader vun der Consultatioun, an aus Transparenzgrënn, huet Wagner Group deemools uginn, datt si mat anere Firmen zesummeschaffen, deenen hire kommerziellen Ëmfang, iwwer Europa ewech geet.

Dës huet awer keen Impakt op d'Agence eSanté wat den Hebergement an d'Dateveraarbechtung vum e-Consultatiounsservice betrëfft, déi am Aklang mat der europäescher Dateschutzreegelung (RGPD), souwéi mat der Sécherheetsnorm ISO 27001, sinn.

De Betrib „G-Core“ huet an deem Kontext eng kommerziell Relatioun mat der Firma Wagner ICT, fir eng technesch Komponent vum Service ze liwweren. Onofhängeg vun dëser kommerzielle Relatioun, muss G-Core, als Fournisseur vun dëser technescher Komponent, déi gesetzlech Obligatiounen vum Dateschutzgesetz (RGPD) an der ISO 27001 Norme respektéieren.

2. Wei ass sécher gestallt, datt d'Gesprécher tëschent Patient an Dokter net vum russesche Staat ofgelauscht ginn?

D'Fluxen tëscht Dokter a Patienten, déi dësen Telekonsultatiounsdéngscht benotzen, si verschlüsselt an den Hebergeuren, an deem Fall d'Firma Wagner ICT, kontrolléiert am Kader vu senger Sécherheetspolitik 24 Stonnen op 24, 7 Deeg op 7, datt d'Systemer net gehackt ginn oder gi sinn. Dës sinn iwweregens Standard Prozeduren fir sécherzestellen dat d'Integritéit vum System a de Respekt vun de verschidde Normen respektéiert ginn.

Am Hibleck op déi éischt Kommunikatiounen, déi an Däitschland zu deem Sujet publizéiert goufen, huet d'Agence eSanté säi Fournisseur Wagner ICT gefrot fir iwwer déi intern besteend Kontrollmechanismen eraus, méi cibléiert ze kontrolléieren ob d'Integritéit an d'Sécherheet vun den Donnéeën net kompromettéiert goufen.



Aus den Analysen, déi vun de Sécherheetsdénkschter vun der Agence eSanté an déi vum Wagner ICT duerchgefouert goufen, ginn et keng Elementer déi drop hiweisen, datt dës Integritéit vun den Donnéeë gebrach gi wier.

Ausserdeem huet den interne Service « CSIRT » vun der Agence eSanté eng Alerte de Vigilance un déi concernéiert Haaptacteuren ginn, fir sécherzestellen dat och déi verschidden Acteuren informéiert sinn a eventuell zousätzlech Analysen oder komplementar méi cibléiert Preventiounsmesuren huelen.

3. Wéi eng Garantië ginn et, datt d'Daten vun eSanté tatsächlech just zu Lëtzebuerg hebergéiert ginn? Gouf dozou schonns en Audit gemaach?

Wagner ICT, déi dem Lëtzebuerger Wagner-Group gehéiert, ass en zu Lëtzebuerg agreéierten Hebergeur. Am Kader vu senger Zesummenaarbecht mat der Agence eSanté huet d'Agence, ewéi all Joer, och 2022 eng „Kontroll-Fournisseur“ bei Wagner ICT duerchgefouert, déi am Laf vun 2023 nees widderholl gi wäert. Dës Kontroll vun der Agence eSanté ass mat den ISO 27001 Prozedure vun der Agence eSanté verbonnen, a gëtt och bei aner Firmen, déi mat der Agence eSanté zesumme schaffen, duerchgefouert.

4. Wei eng Schrëtt envisagéiert de Ministère als Suite vun dese Revelatiounen?

Déi verschidde Mesuren, déi en Place sinn, hu gegruff an och eng cibléiert Analys huet keng Défaillance nogewisen.

Global ginn all méiglech Mesuren en Place gesat, fir d'Sécherheet an d'Integritéit vun den Donnéeën a vun de Kommunikatiounsweeër souwäit ewéi méiglech sécherzestellen. Doriwwer eraus ginn et Protokoller déi gräife wann awer e Sécherheitsrisiko detektéiert gëtt. Dofir sinn och d'Preventiounsmesurë wichteg grad ewéi déi adequat Sécherheitsprotokoller, bei der Agence eSanté ewéi och bei hire Fournisseuren, beispillsweis Firmen déi mat der Agence eSanté schaffen.

Ewéi bei all IT-System, ass et wichteg kontinuéierlech an d'Sécherheet ze investéieren, de Personal weiderzebilden an d'Prozesser ze optimiséieren fir d'Risiken ze minimiséieren. Dofir kritt d'Agence eSanté och entsprechend Mëttelen zur Verfügung gestallt.

Am deem Kontext ass et och wichteg ze präziséieren dat d'Agence eSanté mat aner national Acteuren zesumme schafft, déi an der IT-Sécherheet tätég sinn, fir e regelméissegen Echange ze hunn fir esou beschtméiglech opgestallt ze sinn.

Lëtzebuerg, den 18. Abrëll 2023

De Minister fir sozial Sécherheet

(s.) Claude Haagen